

# Dumenicaccia

*Un omu chi vole inzuccherà  
U mare di i nostri sperà*

Ghjinnaghju era per finisce  
E si n'andava à passi lenti  
Versu d'altre ore più lisce  
E d'altri ghjorni lucichenti

Cum'è s'è l'estate era natu  
A risplende in cor d'inguernu  
Cum'è s'ellu avessi appingatu  
In celu, un luciore eternu

**Un omu una voce  
Era u so cantà  
Cum'è u fiume in foce  
Chi vole inzuccherà  
U mare portacroce  
Di i nostri sperà  
U mare portacroce  
Di i nostri sperà**

Ghjente addunita è serena  
Ghjente à trecce in carrughju  
Da rode marchjone è catena  
Era di pace u so mughju

Cum'è s'è un raghju era natu  
Mez' à tamantu timpurale  
Cum'è s'ellu avessi picciatu  
In celu, un eternu fanale

**Un omu una voce  
Era u so cantà  
Cum'è u fiume in foce  
Chi vole inzuccherà**

**U mare portacroce  
Di i nostri sperà  
U mare portacroce  
Di i nostri sperà**

Ma soca ùn ne po esiste  
Chjarore à mezu à 'ssa fumaccia  
Chi si so scorse nere è triste  
L'ore di 'ssa dumenicaccia

Cum'è s'è u bughju era natu  
Foscù è prufondu in cor di ghjornu  
Cum'è s'ellu avessi appingatu  
In celu, un eternu frastornu

**Un omu una voce  
Era u so cantà  
Cum'è u fiume in foce  
Chi vole inzuccherà  
U mare portacroce  
Di i nostri sperà  
U mare portacroce  
Di i nostri sperà**